

江西詩徵

江西詩徵卷二十四

南城曾煥賓谷編輯

宋

羅公升

公升字時翁永豐人大父開禮從文丞相勤王兵
敗被執不食死公升以軍功授本邑尉北遊圖恢
復不果有滄洲先生集

秋懷

舊日方山子淒涼寄一簞蟲聲來倦枕秋思入凭闌已是
肱三折那堪指一彈中宵更風雨誰念客羶寒

避地

雨急啼鴉切山昏去客奔竄身楚南極獨立鄭東門卜處
無神玆招餘有斷魂死生毫髮事不足累乾坤

四海風濤日誰歟柱急流山東雄劇孟薊北死田疇氣靜
天關晚星沈戍角秋如君關氣數寧不重離憂

絕句

吟膝從軍瘦生涯出仕空山中破茅屋日日是秋風
水旱闕何事兵凶孰汝憐但尋師辟穀莫誤客求田
本是山林物中閒一念差稻粱今懶種况乃種桃花
送歸使絕句

梁楚連天關江湖接海浮故人相憶夜風雨定何州
所聞

試問南來鴈何時戰馬閑古聞侵柳塞今見入梅關南海
潮方怒西江士不還淒涼廣州婦萬里沒燕山

秋望

遠樹嵐煙合孤邨落照橫江從前日濁山似去年青暝色
鴉分去羈愁蜚說成乾坤久蕭瑟消息聽鴻聲

送劉玉田道判歸山

詩工窮鬼妒貌古俗人譏達士何榮辱閑官更是非面無
三已愠身帶一螭歸已試囊中法春田玉自肥

寄蕭高風

義氣凌秋日高懷亘海雲古人如取友天下獨逢君暑退
顏何似書陳夢卻勤木瓜何以報明月爲君分

世故

世故年年別人煙處處非詩從出山俗客已及門稀凱入
猶聞警場登更苦飢乾坤多事在未許製荷衣

戍婦

夫戍關西妾在東東西何處望相從只應兩處秋宵夢萬
一關頭得暫逢

春晚

人在幽窗柳在欄樓頭杜宇一聲殘夢魂驚斷梨花月寂
寞五更風雨寒

溪上

壯歲貪奇覽今年遂考槃門前溪一髮我作五湖看

演福寺

禪崔當年讓福人
早亡何用羨長春
帝鄉坏土真無憾
絕龍沙萬里身

陵州

五月征裘路五千
長安疑在北辰邊
故園歸夢西風冷
明日陵州正覓船

有感

車騎將軍結束新
長安那記昔年身
南來盡是干名者
無復平陽下淚人

旌德寺靜雲亭

巖壑幽幽竹樹青
山泉鳴處看雲生
蒼苔不沒摩崖字
留

與遊人睡姓名

菩提寺

一畝方池幾劫灰
哭聲未了笑聲催
六橋煙柳相逢處
半是菩提拭淚來

發湖州

秋色頻於客鬢加
歸期猶自歎無涯
行纏賸欠江湖債
未著袈裟已出家

靈巖寺

石門木老勢杈枒
曾見吳娃擁翠華
底事秦宮與唐苑
百年多屬梵王家

感懷

自緣舉世弃君平寧爲尊鱸憶季鷹不識將軍何用揖元
非進士底須稱歸尋城郭渾如鶴只欠袈裟便是僧書冊
至今成糞土夜窗猶對短檠燈

湖山人隱居

幽人不管興亡事贏得三年只下簾居介兩山今李愿園
開三徑古陶潛傳家書已爲兒計種秫田應爲客添要與
山神結緣去一邱分我卜茅檐

九日書懷

木落湖山萬葉黃亂愁深處見重陽絺衣只慣詩人體酒
盞全乖病客腸只道事隨人意改如何花作舊時香孤樓
不作還家夢臥聽松風響夜長

蛾眉亭

萬里風濤競擊撞乾坤設險鍵南邦五更畫角三州夢兩
岸青山四面窗太白風流空舊月虞公勲業自長江倚闌
何物堪持玩萬頃烟波鷺一雙

山背道中

是閒定可著吾家流水潏林一逕斜天下獨清惟雪色客
中舊識是梅花妍媸顛倒驚時事戰伐紛紜老歲華風雨
窮山爲誰苦故人何處岸烏紗

秋夕

客散燭亦盡明月共寂寥三生東華夢歲晚依僧寮秋宵
豈不涼客心白如燒循檐歎無寐顧影空蕭蕭

道傍古樟有竹附焉可發一歎

古樟蟠山閒垂蔭翳我里歲久或反常郵童祭爲鬼大穴
藏精靈小隙竄蛇虺嘗聞有驚霆挾挾破根柢竹我君子
徒冰霜凜在齒胡爲事鑽刺蟠屈欽巖裏乾坤亦廣大朽
木烏足恃托身一失所萬水難復洗松栢各相弔爲我二
友恥去去非吾徒偷生不如死

抵舍一夕復行途中遣懷

乾坤本無邊我命自荆棘去住風濤中生死無消息茲晨
夢中歸真幻竟莫測形聲各已改老稚不我識一燈話清
涼喜極淚始滴出門動經年還合甫浹昔云胡作驚鷗又
復告行役雨聲挾離思春晚作秋色暮山試回首上有雲

氣白天長眼力短此意幾悽惻

觀碁

秋風動江皋吹落鷗鷺影先生江湖心收作目中景庭深
樹陰好門掩禽語靜一聲寂寞中恍若隔人境胸中兵十
萬臨敵暇且整歛之塞成皋縱去舉鄢郢僕方棲會稽塞
足未得騁中原儻相逢亦有憑軾請

看書有感

鄙俚趨庭日真期萬里程開編十行下刻燭五言成頗笑
阿時學方懷覽古情祇言如昨日不悟已前生客裏餘長
缺忙中負短檠舊言如遠客新卷卽生兵文武終何執行
藏雨未明空餘清夜夢時作讀書聲

秋懷

歸輿穿翠微夜久樹益蒼海澹浴清波吐此林表光今宵
衣上露明日履下霜兒童不知此且喜今夕涼風林忽響
答似識予心腸

感舊

逝水日已遠愈覺別恨重歲月不可留又已聞鳴蜚故衣
餘手澤見肘未忍縫遙知春去後飛花散無蹤遊魂定何
依馬蹄隔千峯誰與持麥飯一灑冢上松憑高酬觴酒聊
以寫我胸彭殤同所歸百歲還相逢但留一寸心不愧三
尺封

戲蕭高風曾孟聲二友

丹鳳辭舊樓四海求其鳳偶來梧竹閒振翮鳴朝陽衆禽
不自揣競欲依餘光神物要自珍微羽那足當了知霄漢
姿不集灌莽場所憂燕雀雜坐更鴻鵠藏丹山有佳侶足
以陪雙翔人間勿爲留歸哉白雲鄉

飛鴻響遙空抱弋空遺影游鱗縱前川把釣睨枯井相看
各如夢欲去幾延頸勞心縱有獲所獲僅鼃黽行人見之
笑千喚不一省滄溟四無邊盡納天地境巨鼇載三山未
足污吾綬相顧作清遊濯足壺嶠頂

散慵

散慵陟嵐嶺恰與落日平天秋萬宇澹盡見山水情遙煙
破衆寂危花疑月明川原自瀟灑衣袂皆風聲鑒空識本

性憑高失平生蒼然暮色合興盡心復驚

曉起

危柯蚤得秋羈鶴易知曉幽人帶星起古木叫孤鳥簾影
一丈高曙色萬里杳人稀蒼茫內樹立浩蕩表安知南征
雲不自厭紛擾秋光接巖氣終覺風味少紅衿木芙蓉麗白
惜渚蓮天觀妄眼已空觸物思還悄賀公豈真狂有激或
成矯歸登神聖臺一笑萬緣了

夜月懷超然故臺

中宵雨聲歇好月滿我屋開門四無人老樹立於獨巡檐
不成寐送影過牆竹賞弄情未央矮屋礙遠目故山有層
臺千里曠遊囑主人三年別坐使萬瓦覆鵬程本逍遙蟻

穴自羈束乾坤有興廢豈必善者福是身且非我而况土
與木但聽雍門彈忽效孟嘗哭

冬至

窮冬乃常燠庭礎上雲氣索居其誰語煮藥作冬至客來
寄枯基客去玩奇字是中卽了我自得在不智偷生輕日
月長短亦何計惟應開闢事頗得大易意門前鳴騶急窗
外飛雨細雲物吾不知曉枕一覺睡

從軍留別天逸

一閑五千口功德高於山如何天不借驅向金草開妖血
醒人飢馬足愁險艱今宵觴詠處已帶風雲顏皇穹未厭
亂肯放兩腳閑東游還山湖廬峯定天關卽往不可留我

去何當還後夜夢君時哀筇鬢成斑

從軍興平

廢墟起寒煙饑鼠意自安十年行脚處重到無一可乾坤
鍾虿會推擇乃及我東皋雨犁手長戟三歲荷治絲慚益
焚杯水不救火窮山高馬齒華屋實野果平生踈懶報歲
晚困羈鎖有如醉行人日暮路益左未須說神仙大福在
無禍但當求蒲團不復夢猿坐

喜雨

三更飽甘雨脩肱涼意秋驚霆駕風至氣欲掀我樓溟濛
剗軒豁稻隴如潑油兵凶歲相仍糟糠甚珍羞天公一反
手少緩帶犢謀諸賢自蒿日百晦真吾憂

有念

方招東渚魂又送北阡交遊亦餘幾日覺眼中欠向來
所憫者一一皆可念憂愁鬢先霜形影吾自厭春華已零
落秋木豈陽艷緬懷郢人質徒挂季子劍

納涼

氣至暑固當境寂涼自生天河白如水夜久山更明古樹
有莊色新泉入幽聽逃空空快事喪虎不可停飛螢過屋
頂一落如流星

秋口有感

桂花無主亦清秋蕎麥爲誰先白頭螢不照身常隱見鷗
無求世事沈浮

再如吳門

地凍江空鴈不飛孤帆何事又乘危更無殘雪山陰興漫
有窮冬蜀道詩自笑大瓢長瀟落可醉羣鳥議瑕疵吳門
市隱非梁籍名姓寧須假手知

趙復

復字仁甫惠安人元太宗伐宋被俘至燕議不仕
楊惟中建太極書院請復講授其中復作傳道圖
學者稱之曰江漢先生

覃懷春日

江南江北半浮生蹤跡居然水上萍竹雞啼罷山雨黑蠶
子生時桑柘青

錦瑟詞

歌珠檀板楚王宮半醉花間拾落紅
鐵馬北來人事改不知隨水定隨風

薊門雜興

何物愁來白髮生月高霜冷正參橫
一聲寒角城鴉起吹盡梅花怨未平

再渡白溝

瘦馬柴車出白溝河山依舊繞神州
都將百萬生降戶換得將軍定遠侯

薊門聞笛

夢裏繁華醉裏遊倚天青壁障危樓
梅花哀怨成何事吹

破中原二百州

山峽圖

蕭蕭十二峯前路月落猿啼霜外樹半夜誰家上水船竹枝歌入瞿塘去

鄧有功

有功字自大號月巢南豐人少舉進士累試禮部不中以恩補迪功郎爲金谿尉年七十卒後學稱月巢先生有月巢遺藁

玉山道上

玉谿谿上雨聲乾日暮東風客衲寒數樹梅花吹作雪行人猶自倚闌干

客信豐寄劉起潛

怪得寒燈昨夜花五更歸夢倏還家
多情兒女傷離別爭挽征衫問鬢華

嶺南咫尺莫如處和煖嚴寒別有天一
夜詩魂清到骨曉霜封却釣魚船

賀劉廸功揆赴召史館校勘

秋堂風露聲唔唧青燈一點昏兩
眵蟬魚蠹紙老白日未識心宇包
黃蘗麟膠飲盡霜兔泣儷花鬪葉
紛奇姿少年輕裘舌秦衍睥睨六
印京塵縉平生眼底厭糠粃自對
春風樂沂水搜奇挾怪問子雲載
酒歸來成獨醉金刀喜有南鄰翁
會吹藜醖丹霞峯白雲滿榻呼不
起斜日倚杖酣

秋空紫皇一夕下綸旨細破丹鉛勘文字會將一語贊陽
秋高入九天卑九地聖明勲業琬琰儲不獨焜耀冰銜書
兩朝蒐輯摩日月往往呼喝羣庭衢廬陵健筆人莫贖南
豐辦香竟誰續西江浩浩流古今莫遣白頭愧青竹

送曾子華遊顙

丈夫達有遇出令走千里焚香玩太空宴坐塵不起云胡
子曾子不自樂沂水風烟挾兩袖足跟尙芒屨持被直承
明三省良未已觀君氣如虹接浙亦可美昔年子長游落
筆妙信史三蘇出岷峨文章仰歐子此行崆峒顙萬事寧
足侈鬱孤有奇觀佳句公摩洗予生事斗室出若畏瀾蠡
長安歌狹邪神鼎鑄螭魅窮通匪同塗動靜實一理時止

復時行願與參此旨

何行

行字自強廣昌人宋末以明經知武平縣宋亡不仕有集

題龍泉觀

蓬萊境界隔風烟一帶銀河接九天
禮斗瑤臺春草合
紫龍石鉢玉沙圓
紅雲幾片危樓上
古木千尋落照邊
惆悵仙人何處去
空餘月色滿山川

黃叔美

叔美字河清南城人仕宋爲登聞檢院宋亡隱居盱南山中有集

登麻姑山

昔日登臨不用扶於今白首見麻姑此邦泉石何蕭爽異
代神仙知有無七月山田紅稻熟去年塵海碧蓮枯信知
冠蓋追遊地羽客相逢到日晡

李士會

士會字有元樂平人以淹博名德祐間嘗徧訪邑
中故實纂樂平廣記

過戴村

人民城郭望中非從此西遷更向西曾是萬家雄井邑依
然一帶好山溪津無斷鎖沈江渚寺有殘鐘委草泥碑碣
更隨年月換興亡往事向誰稽

熊與蘇

與蘇字天樂豫章人通經史百氏之書性介淡布
衣草屨遨遊諸名山尤嗜彈琴草書

唐元宗鐵像

魏冠攢疊碧雲花坐閣山中幾歲華莫把金丹輕點化正
愁生死困安家

木平飼龍亭次韻方巨山

耳見何如得眼聞山根磅礴極初分浮漚起滅自潭影大
地晴陰空嶺雲何處老人來聽講他年少府有移文由來
清調須吾輩幸不山王媿五君

劉敏求

敏求字好古號松菊老人泰和人宋末累舉不第

湖山

信相昔棲岩寒潮日三入祖攜瓶錫去潮音斷消息山因
潮得名傳者非一日惟餘松檜風經年弄蕭瑟昔攜三二
友傲岸興頗逸往往日多暇十景快吟筆蹭蹬今幾時依
舊山屏碧白雲豈無心常依吟處石

王山

琉璃宮闕知何處玉洞年年鎖煙霧古人遺跡杳難尋只
有青山色如故青山峯律摩斗魁丹井星壇疊翠苔玉龍
經歲睡初起但覺噫笑生風雷昔日真人何澹泊蟬蛻人
間軒冕樂忽乘風馭今幾年至今不見雙飛鶴我辭塵網

到仙家馬蹄破雲歸路賒何時功名勒鐘鼎來伴羽衣餐
紫霞

登快閣次山谷先生韻

蘭臺應與閣齊名幾日陰濃雨乍晴雲水光中天不夜塵
埃境外月偏明屏開別岼三峯秀川映危闌一練橫釣嶼
筆床嘗有約定求烟艇不寒盟

東巖

岩人何處在遺跡杳莫尋多應隱君子去作商家霖

西巖

我業風門口坡陀虎穴西向來梵雲寺秋草鷓鴣啼

武婆岡

一自飛仙去，逍遙白雲上。歲歲春風來，湖山青草長。

題滕王閣

閣中環珮知何處？遊子再來春欲暮。鶯啼紅樹柳搖風，疑是當年舊歌舞。古來興廢君莫嗟，君看紅日西山斜。西山不改舊顏色，換盡行人與落霞。

曾澈

澈南城人

九齡行鮑輶過肝江遇一童子眉目疎朗語援古今驚問之逆旅主人子也載訪死矣得其詩一

首於同舍生

我生九齡氣食牛，喑鳴頓挫無匹儔。白雲無根起天末，一身萬事同悠悠。低頭拱手事先覺，談笑未了成仇讐。一譽

不足勝百毀言語起滅如浮漚聖賢可與知者道麟鳳豈
在山中遊遽然夢覺大槐國江花昨夜生涼秋

孫璉

璉字器之大庾人家貧嗜書善吟詠不應舉躬耕
織屨以爲食壽百歲

述懷

坐倦秋樹根攝衣步前邱橫河澹如練破月西南流獨持
一尊酒悠然發清謳俯仰無不足吾生焉所求

邵定

定字中立廬陵人溫粹博雅通周易春秋宅邊植
梅竹蘭桂蓮菊各十餘本婆娑其間自稱六薌老

人

山中

白日看雲坐
清秋對雨眠
眉頭無一事
筆下有千年

漁家

漁家臨水住
春盡無花開
年年謝流水
流得好花來

洪師中

師中鄱陽人

大滌洞

搗藥禽啼雨
後山千巖萬谷鎖蒼寒
一溪春水高三尺
書
畫船中更好看

九曲青山一曲溪
仙人住處自春遲
荀輿切莫匆匆返
要

江西詩徵

卷二十四

宋二十

五

作春行卷裏詩

甘詠

詠字詠之一字中夫崇仁人自號東溪子生宋末
工詩不娶有東溪集

自述

總角希聞道殘生迺付詩未曾前輩識敢辱近人知飄泊
身餘健蕭閑鬢欲衰一簾書四壁寒日在清池

與危見心同和完顏御史沂聯步踏月韻

明月送人歸明月照人宿月落夢醒時清霜壓寒屋

小絕

一夜睡不著小牕天忽明林塘寒鳥聚聽得最初聲

夜坐

林風自瀟瀟山雨時灑灑丈夫七尺軀地爐使吾矮

早睡

病來貪睡早推月出山前月色不相捨小牕還自妍

歸舟

片帆懸空秋滿腹涼月淡淡天無波平生湖海元龍意早
入西風漁櫂歌

天壤豈無蘇季子恨我不識韓荆州遙山蒼蒼暮雲碧何
許一笛蘆花秋

下豫州

壯懷忍共白雲閒孤負僧房屋半間賣却牢愁三萬斛載

將明月入西山

托意

舊時燈火不知年
托意篇章末世傳
胸次只今無此事
聽風聽雨過殘年

看梅

獨坐惓惓不自適
出門偶見梅花開
自從開闢到今日
此是東風第幾回

劉鑑

鑑字清叟號立雪
江西人有奇氣
累試不第有立雪藥

題醉月亭

采石江頭李太白狂不奈煩宮錦窄赤壁磯下蘇東坡一
葉泛泛凌風波當時有月并有酒和酒和月吞入口酒腸
得月冷于冰化作魂辭喧宇宙兩首賦百篇詩千秋萬古
稱絕奇兩翁不作歸來鶴玉宇瓊樓寒漠漠若得長江變
潑醅少住人間亦差樂望圓晦缺秋復春古來明月今來
人我時舉酒問明月月亦團團磨不得鐵如意玉唾壺我
歌君和聲嗚嗚爛醉起舞喚人扶問影莫是李與蘇月中
仙子知得無

登黃雀樓

西風吹我登黃雀白雲半在闌干角題詩不見舊時人惟
見青山俯城郭萋萋芳草鸚鵡洲江水衮衮來無休歲月

俯仰成春秋古人今人無限愁

寄朱約山

歲晚江空煙水寒楓林葉落楚天寬
苦無雁足書難寄作盡鶯聲吟未
安晉帖臨成思入石離騷讀罷擬栽
蘭老來絕被梅花惱後會君應笑我
孱

見提舉蔡澗松

今人標致古心胷吉士依歸有澗松
白髮半頭身欲霍蒼緇千丈氣如龍
三年博士留韓愈十載中郎老蔡邕
根脚青原培植久蓬萊行上最高峯

月巖

世事從來滿則虧十分何似八分時
青山作計常千古只

露殿前月半規

題靜軒

徑深寂寂鎖苔茵此地不生車馬塵
夢斷瑤臺惟有竹
琴聲花院似無人
蛛因門閉牢穿網
鵲悟枝乾自采薪
祇道乾坤大如許
不知天地又新春

謁蕭大山

阿統遙知是迺宗
作詩工似選詩工
寫成判語皆吟筆
翻作離騷再國風
共喜橫渠傳有弟
久誇坡老學如翁
世間師友多零落
今在庭闈諾唯中

賀周總管耐軒遷居回任

就第開藩自古難
旌門累世況團圓
肯邀父老爲鄰舍
更

約交游說歲寒千里春風棠蔽芾一窗秋月竹平安鄉人
鄉飲推鄉貴祇作平時樣子看

袖詩兩度出山扉到得城來與願違南浦綠波凝望久東
山零雨喜公歸疎梅鬪雪增新潔喬木參天長舊圍重對
門牆簾定卷春風賀厦燕栖依

謁蕭小山

一冬晴暖春相似欲扣吟闕未有詩折得梅花裝擔了起
程還是雪飛時

一水凝寒棹不開幾人於此欲船回思君卻有扁舟興半
夜直衝風雪來

葛慶龍

慶龍號秋巖又號寄漁翁九江人少學浮屠歸俗
後禹越放浪江湖以終

贈僧

七軸蓮經供茗瓢一龕繡佛挂松寮
船香亦帶魚龍氣自來枝頭柏子燒

謝理得惠書

五朶飛來清剡藤重重響似水泠泠
不教落在紅塵耳讀與青松白鶴聽

詠黃石公

挾書律重火猶光天下嚴搜不敢藏
圯上老人無見者一編親寫授張良

筇杖

白髮慵巾短短衣閑行斜倚小筇杖自家弄影猶癡絕只似初騎竹馬時

題仙人洞并謝草堂方公所贈石匣

多謝林僧亦好奇新遺石匣我酬詩鶴胎收卻雲封裏付囑山靈木客時

雲長鎮洞有時開石匣終藏化鶴胎千歲不須華表柱飛鳴南向洞山來

遊寶林寺

坐如有待思依依看竹迴廊出寺遲窅窅綠陰清寂處半窓斜日兩僧基

劉彥章

彥章吉水人宋亡後與劉桂隱劉申齋講學

題廬陵義士傳

淮海風迴吹血腥青原不改舊時青
中朝將帥論功賞不及江南一白丁

題新淦劉貞女傳

百年節義仗英豪一死翻憐女子高
不敢高歌題卷上轉喉恐觸舊官曹

胡斗南

斗南號貫齋廬陵人

挽文山

裂指秋風感別離
乾坤人物太奇奇
生爲孝子忠臣勸死
結皇天后土知萬折
江流魚腹石千年人
立首陽碑一門
史氏春秋筆愁絕湖
光入畫時

況志寧

志寧號康齋奉新人

郡城春風樓

晴日游絲拂畫欄
酒帘輕漾碧雲端
春風蛺蝶知何處
愁絕江南曲已殘

百花橋

波光清淺玉虹橫
過客誰題柱上名
錦繡鋪張春色滿
小車花下麗人行

豫章臺

城陰冷落豫章臺平地晴沙捲雪來
欲訪鄰翁問塵跡小園荒徑長莓苔

梅仙壇

上疏歸來事可歎嶺頭誰爲築星壇
先生不食炎劉祿自拾松花常晚餐

劉鏜

鏜號秋麓南豐人壩之叔父高年隱居著作不倦
尤長絕句曾元伯刻其遺吟以絕句爲首其書不傳

觀雉

寒雲岑岑天四陰畫堂燭影紅簾深鼓聲淵淵管聲脆鬼神變化供劇戲金窪玉注始淙潺眼前倏已非人間夜叉蓬頭鐵骨朶赭衣藍面眼迸火魑蜮罔象初倂伶跪羊豕豕相嚶嚶紅裳姹女掩蕉扇綠綬髯翁握蒲劒翻筋踢斗臂膊寬張頤吐舌唇吻乾搖頭四顧百距躍歛身千態萬竿索青衫舞蹈忽屏營采雲揭帳森麾旌紫衣金章獨據案馬鬣牛權兩披判能言禍福不由天躬履率越分愚賢疾藜奮威小白服由數勿切鬼頭也盤繆揚聲大壘哭白面使者竹筱鎗自誇搜捕無遺藏牛冠笏卷試閱檢虎冒肩戟光映閃五方點隊亂紛紜何物老嫗縶擾熏終南進士破羝綉嗜酒不悟鬼看戲奮髯瞋目起婆婆衆邪一正將那何

披髮將畢飛一呖風捲雲收鼓簫歇夜闌四坐慘不怡主
人送客客盡悲歸來桃刻坐深蘭翠鵲黃狐猶在眼自歌
楚些大小招坐久魂魄游逍遙會稽山中禹非死鑄鼎息
壤乃若此又聞鬼姦多馮人人姦馮鬼姦入神明日冠裳
好妝束白晝通都人面目

詠陳後主

晉王前殿賀平陳從此江南雨露均四百年間重混一誰
知江令是忠臣

朱浚

浚臨川人有梅邊集

寄友

江西詩徵

卷二十四

宋二十

三

谿月知相憶江雲約共吟
夜船書一紙飛過赤楓林

秋日西湖

幾州陵變谷經月雨爲霖
世事今如此西風動客心

贈賣墨呂雲叔訪陳烟山

仙宗傳訣自分明未數當年老樹精
一片紫雲光滴滴丹
垆成就幾公卿

蓬萊仙子世偏珍琮璧多攜問楚津
若向積烟峯下過殷
勤傳語臥樓人

都城初秋和趙京倅

從來美玉價連城結佩乘風十二京
攜上崢嶸今有約好
蘭采筆調清平

暑夢蟲蟲似醉中
片雲挾雨過長空
不知秋色來多少
一派炎涼任晚風

楊 雯

雯字天章清江人應登孫

宋武帝廟

溪聲答松風
巨石出老拳
古樹不知名
岌岌蛟龍纏
夕陰互出沒
秋華帶芳鮮
葱葱帝王氣
棟宇垂千年
虎賁秉霜戟
慘淡生雲烟
宮人翠龍駕
手持玉連蜷
昌明坐恍惚
精神靈在天
大呼司雍閒
旬月無秦燕
昔爲萬夫特
今受衆目憐
石馬亦埋沒
歲時草芊芊
小臣異代士
見之淚迸泉
齊人思爽鳩
蜀人哀杜鵑
江東舊正朔
禮奉敢不虔
但願

君主心不忘載荻船下山又再拜白日當空懸

迢迢空同山

迢迢空同山乃在西極巔玉泉陰靈芝上有千歲仙安得
凌風翼相從白雲間神仙本冥漠天運仍推遷不如酌我
酒或得成自然田父要我語飲者亦非賢願君長獨醒加
餐足高年

北客

北客相催發一日舉千帆遙憐庾開府歲晚望江南

宿峽市

人烟正搖落樓館頗清幽老樹依山驛東風上峽船江湖
萬里外燈火十年前卅一路能令老吾生且醉眠

早春

不知何處碧雲冉冉平生可斷腸
怪底乾坤惟夢短老來歲月更心長
城頭急鼓千家怨江上殘梅一水香
自作醉侯開醉國笑人奔走爲誰忙

遊觀山

古寺隱山腹蒼苔行地衣岑寂少人迹
路纔一線微問誰促公行一句山谷詩
閒來就湯沐聊叩幽人扉相投一杯水
氣味如曹溪興盡卽云返重到還無期

玉山

霞衣玉珮去飄飄控鶴仙人不可招
難信嶺頭頑石畔分明有路入青霄

曾唯仲

唯仲南豐人宋末解試不仕

賦草意義試詩

輦路淒淒隔歲華王孫望斷怨天涯
庭空煙雨無人管那有閒情襯落花

湯清伯

清伯南豐人

按隱居通議云江南承平時鄉塾諸齋出題示學者考驗最名曰義試詩

當鈔錄成帙爲記湯清伯詩云云據此乃南宋末人也

賦夾竹桃

芳姿勁節本來同綠陰紅收一樣濃
我若作龍君作浪信知何處不相逢

金

楊雲翼

雲翼字之美樂平人明昌五年登經義進士第一
人興定末拜禮部尚書文章與趙閒閒齊名世號
楊趙高文大冊皆出其手正大五年卒謚文獻

大秦寺

寺廢基空在人歸地自閒綠苔昏碧瓦白塔應青山暗谷
行雲度蒼煙獨鳥還喚回塵土夢聊此弄澄灣

煙雨

涼氣先秋至重陰接望迷有無山遠近濃澹樹高低鳥雀
枝間露牛羊舍北泥支頤政愁絕風雨過前溪

侯右丞雲溪

功成何許覓菟裘
天地雲溪一釣舟
夢破頰襟濯明月
詩成醉耳枕寒流
西風歸興隨黃鵠
皓日盟言信白鷗
政恐蒼生未忘在
草堂才得畫中遊

光林寺

煙浮霜塔閉禪關
今落先生杖履間
碧水同來弄明月
黃塵不解汗青山
因緣多自成三宿
物我終同付八還
欲識光林全體露
松花落盡嶺雲閒

謾興

乍寒簾幙一燈青
從吏羈情爾許清
葉擁西風秋有思
天垂北斗夜無聲
吟菴遶夢家千里
過雁連愁月四更
寄語

黃華耐岑寂好看霜蘂到歸程

上白堦寺

睡飽支筇徹上方門前山好更斜陽
苔連碧色龜趺古松落輕花鶴夢香
身世窮通皆幻影山林朝市自閒忙
簾櫳不動天風靜莫聽鈴中替戾岡

張廣文消搖堂

方寸閒田了萬緣大空物物自翛然
鶴鳬長短無餘性鵬鷗高低各一天
身內江湖從濩落眼前瓦礫盡虛圓
叩門欲問姑山事聾聵由來愧叔連

戴嵩畫牛

春草原頭雨溼烟夕陽渡口水吞天
披圖坐我風蓑底一

江西詩徵

卷二十四 金

五

夢長林二十年

蔡村道中

水連深竹竹連沙村落蕭蕭已暮鴉行盡畫圖三十里青
山影裏見人家

陽春門堤上

薄薄晴雲滿日高雪消土脉潤如膏東風可是多才思先
送輕黃到柳梢

聞韶圖

千古神交寄至音聞韶想見聖人心容聲便落笙蹄外後
學休從肉味尋

迴文

梧井落花秋寂寂竹窗搖月夜沉沉孤鸞舞處回腸斷遠
雁來時別恨深

和呂介甫

山下三秋雨山中六月涼樹林溪谷暗花藥小闌香夢破
風閒卷詩成鳥送觴紅塵多內熱政爾救煩忙

雙成寺中登樓

雲意生陰晚不收西風疎雨一江秋畫圖忽上闌干角隱
隱平灣轉釣舟

父老

寄樂平令
胡德玉

老去宦情薄秋來鄉思多遙憐桑隴在無奈棘林何白水
青沙谷黃雲赤土坡幾時隨父老社酒太平歌

應制雪詩

陰雲破臘不曾晴
瑞雪隨風落五更
積玉未平鵲鵲飛
花先滿鳳凰城
潤深農畝千疇綠
塵壓龍沙萬里清
最好壽杯浮喜色
明年洗眼看昇平

元日

香爇猶餘去歲烟
五更斗柄已回天
來從天外春何早
倭向人閒老不偏
莫問流光似流水
且從今日數今年
東風五十七年夢
夢覺還驚雪滿顛

太一湫

四崖環抱鏡光平
數畝澄泓石竇冥
寒入井頭千丈雪
淨涵巖際一天星
傍人爭出魚依勢
銜葉飛來鳥護靈
日日

東風送潮出只應絕頂透滄溟

應制白兔

聖德如天物効祥褐夫新賜雪衣裳光搖玉斗三千丈氣
傲金風五百霜禁籞合棲瑤草影御爐猶認桂枝香中興
慶事光圖譜黼坐齊稱萬壽觴

李平甫爲裕之畫繫舟山圖閒閒公有詩某亦繼作
名利走朝市山居良獨難况復山中人讀書不求官東巖
有佳致書室方丈寬彼美元夫子學道如觀瀾孔孟澤有
餘曾顏膏未殘向來種德深直與山根蟠之子起其門孤
鳳騫羽翰計皆聊爾耳平步青雲端竭來遊京師士子拭目
觀禮部天下士文盟今歐韓一見折行輩殆如平生歡

舞雩詠春風期著曾點冠五言造平淡許上蘇州壇我嘗
讀子詩一倡而三歎世人非無才多爲才所謾高者足詆
訶下者或辛酸吾子忠厚姿不受薄俗漫山雲意自高淵
水聲無湍他日傳吾道政要才行完會使此山名與子俱
不刊

閒閒公爲上清宮道士寫經并以所養鵝羣副之諸
公有詩某亦同作

曾稽筆法老無塵今代閒閒是後身只有愛鵝緣已盡舉
羣還副向來人

登六賢堂

榆關城構倚長天寂寂虛堂像六賢行善槩皆傳故里功

名何異寫凌烟子孫繼業何如在桑梓牽情我自憐無限
雲山遮遠目登臨時遣興悠然

馮延登

延登字子駿吉州人承安二年進士令寧邊正大
末奉命北使見畱羈管豐州二年乃得還天興初
授禮部侍郎京城陷自投井中死

宿三家寺

老栢蒼蒼纏老藤招提牢落有殘僧
暝禽自入藏經閣饑鼠時窺照佛燈
未得安心如北秀却思覓法逐南能
濛濛雨暗門前路更想雲房一曲肱

寄笏青柯平

江西詩徵

卷二十四金

无

飛雪驚沙捲屋茅清寒潑水透綈袍松風度壑江聲遠蘿
月當軒扇影高敢對名山談世事不妨空腹貯離騷且將
手版牢藏起政恐山人識馬曹

華清故宮

寵貴羊羔退曲江華清霧閣對芸窗層巒未了霓裳舞遷
客俄驚羯鼓腔簷際疎星疑曉鏡天邊晴樹認高幢遊人
尚喜風流在白石涵波皂莢雙

鄆城道中

北風滲澹揚沙塵鄆西三日無人行十村九村雞犬靜高
田下田狐兔馴昨朝屏息過溪口知有白額藏深榛赤子
弄兵更可憫路旁僵屍衣血新野叟偃僂行拾薪欲語辟

易如驚麕瘦梅疎竹未慰眼只有清淚沾衣巾

元日隆安道中

山岡重複三竿日溪路縈迴一席天老境飄零情更惡又
從馬上得新年

代郡楊黻之與余同辰月日時亦然渠有詩因爲次
韻

陰陽亶亶定何如自信祥金先有模曾見唐生談躍馬豈
知阮籍哭窮途倦游笑我衰髯白弄筆憐君醉袖烏便欲
移書與歐九畧分餘論爲噓枯

射虎得山字

田翁太息論三害獵騎俄驚耳一斑涎口風生雷吼怒角

江西詩徵

卷二十四

三

弓寒勁月痕灣柳營共許千人敵魚服仍餘一矢還我欲
殘年賞神駿短衣匹馬夢南山

雪

破屋寒無那庭空雪已深山川非舊觀松栢見真心凍雀
爭遺粒棲鴉點暮林攜琴訪溪友清興憶山陰

西園得西字

芳逕層巒百鳥啼芝廬蘭畹自成蹊仙舟倒影涵魚藻畫
棟銷香落燕泥淑景晴薰紅樹暖薰風輕汎碧叢低岡頭
醉夢俄驚覺歌吹誰家在竹西

八月十四日宿官塔下院

野僧引客看修竹拄杖入林驚暝禽一道細泉鳴薛磴恍

如閒聽穎師琴

喬松修竹翠交陰
冷月玲瓏地布金
老嬾無詩酬節物
夜涼閒聽候蟲吟

探春得波字

好雨新晴景氣和
東波冰盡水增波
茅茨影裏燕雙語
桃李梢頭春幾何
霽靄未收芳陌潤
斜陽偏傍小樓多
雕鞍畫轂方爭道
更得畱連藉綠莎

春雨

山市人歸暮雨飛
倚筇久立看簷霏
乍來勢若懸麻密
暫止聲如鼓瑟希
砌下蟻歸低赤幘
簾間燕入濕烏衣
今宵客夢知安穩
厭浥新涼到枕幃

小雨濛濛潤土膏
谷風習習不驚條
晨烟半濕低平野
春水初生沒斷橋
已見鵝黃勻柳麥
更看檀紫上榆椒
從今樂事知相繼
櫛比雲平看隴苗

藤花得春字

白白紅紅委暗塵
蒼藤次第看花新
龍蛇奮起三冬蟄
纓絡紛垂百尺身
見說紫雲偏得意
不知翠幄巧藏春
齋厨晚甑清香滿
未信侯門有八珍

蘭子野晚節軒

華顛益信寸心丹
直道寧論末路難
不歎士元淹驥足
但憂仲叔累猪肝
籬根佳菊分秋色
簷外長松耐歲寒
凡有琴書樽有酒
卻愁兒輩覺清歡

洮石硯

鸚鵡洲前抱石歸
琢來猶自帶清輝
芸窗盡日無人到
坐看元雲吐翠微

王世昌

世昌字慶長寧州人
貞祐三年進士
以信都丞致仕

過華州

拔地三峯冷翠微
落崖飛瀑噴珠璣
吟鞭落托騎驢過
戰刃韜藏牧馬歸
十丈玉蓮秋不謝
半楞掌月晝還飛
地靈人傑無遺逸
未分蟠螭老布衣

方城東寺海棠

苦芭如針草有芒桃花輕薄絮顛狂少陵例有詩沾丐只
枉無言到海棠

徐好問

好問字裕之永寧人

龍門

疏鑿而來道路通行人萬古翠微中南山山寺題詩滿一
字何嘗到禹功

陳君可

君可永寧人

梅影

隔窗疑是李夫人江月多情爲返魂不似丹青舊顏色十

分憔悴立黃昏

江西詩徵卷二十四

江西詩徵卷二十五

南城曾煥賓谷編輯

元

劉秉忠

秉忠初名侃字仲晦瑞州人後徙居邢州至元元年拜光祿大夫保參領中書省事更名秉忠卒贈太傅趙國公諡文貞成宗時改諡文正贈太師仁宗時追封常山王有集

有懷

雨過幽庭長綠苔東風時爲掃塵埃無人曾見春來處門外桃花只自開

春日效宮體

雨洗芳塵絕點埃桃花零落海棠開沈香亭小圍紅樹六
液池清映綠苔夜月也曾懸漢殿朝雲何只在陽臺六宮
簾捲東風軟一派仙音翠輦來

寄友人

悠悠離闕感中年我輩情鍾豈不然好景與時渾易過可
人如月只難圓五更殘夢雞聲裏千里歸心雁影前漠北
雲南空浪走今春又負杏花天

宋張甫彈秋風

穹廬悄悄夜漫漫午醉醒來坐席寒富貴有媒皆豹變功
名無分獨螭蟠子陵實愧三公爵靖節非輕一縣官高捲

種籬對明月秋風一曲入琴彈

秋日途中

半紙功名滿地愁都教白了少年頭
早應未拜曹參相終不當封李廣侯
曲水亂山紅樹晚西風殘照白雲秋
歸鴉一片投林去自笑勞生未解休

過天井關

雲冷風高天井關太行嶺上看河灣
九州占絕中原地一壘攔迴左界山
王霸分爭圖未捲英雄鏖戰血猶殷
華陽春草年年綠汗馬南來不放閑

留燕

啣泥舊燕壘新巢來往如辭曲
折勞蝸舍雖微足容爾畫

梁爭得幾多高

九日滿坦山

凌雲氣節鬢驚秋
書剋荒寒事遠游
萬里嵐光乘馬背
一川紅葉上鰲頭
西風不管參軍帽
絕塞空凋季子裘
誰把茱萸念行役
憑高拭目望神州

江上寄別

軍中無酒慰飄零
孤負沙頭雙玉瓶
鞍馬幾年南北路
關河千古短長亭
好風到枕客愁破
殘月入簾歸夢醒
望斷故山人不見
曉來江上數峰青

勸友人酒

西風落葉共蕭颯
百感中來不自由
豪客空攜鐵如意
舞

鬢徒費錦纏頭
曳過雨脚雲歸岫
湧出山尖月滿樓
一曲清歌一盃酒
爲君洗盡古今愁

宿中山乾明寺

客散關門厭事譁
鑪香滿屋臥煙霞
人辭故里几三載
僧到伽藍自一家
夢破小窗浮月色
漏殘寒角奏梅花
天明又上潯陽道
駕水歸程漸有涯

晚遊

山水清佳自在遊
利名莫莫復休休
瘦筇此日眞忘世
長笛何人肯倚樓
鴉落點成千樹墨
雁飛橫絕九天秋
歸來小院松梢上
新月低斜玉一鉤

睡起

連歲驅馳萬里程碧臺歌舞笑爭名山中猿鶴丹心在塞
上風煙白髮生對客倦談當世事懷人難悉未歸情雪花
亂打西風急總似芭蕉夜雨聲

讀遺山詩

劍氣從教犯斗牛百川橫放海難收九天直上無凝滯更
看銀河一派流

北里笙歌勸酒盃南鄰門巷冷如灰秋風萬里方搖落叫
殺孤鴻春不回

青雲高興入冥搜一字非工未肯休直到雪消冰泮後百
川春水自東流

雲霞閃爍動霓旌轟磕 鼙震地聲千里折衝歸指畫將

壇孫子獨論兵

馳車行

馳頂丁當響巨鈴萬車軋軋一齊鳴當年不離沙陀地輾
斷金源鼓笛聲

溪上

蘆花遠映釣舟行漁笛時聞三兩聲一陣西風吹雨散夕
陽還在水邊明

城西遊

昨朝信馬鳳城西鞭約垂楊過小堤春色滿園花勝錦黃
鸝只揀好枝啼

客館

客館蕭條動客情
飛螢箇箇傍窗明
樓頭鼓角風吹斷
漏下銀壺第一聲

春始來

三月南州草木長
落花飛絮滿池塘
東君也惜天涯客
盡放春光過界牆

東勝道中

天荒地老物消磨
贏得詩人感慨多
兩鬢黃塵秋色裏
又投東勝過黃河

劉秉恕

秉恕字長卿瑞州人
秉忠弟至元初累官禮部尚書
歷湖州平陽兩路總管卒于官

白雲樓

旌旗嫋嫋入隨州江漲祥烟散復收黃耳不來家信遠西風腸斷白雲樓

程鉅夫

鉅夫名文海以字行徽州人宋德祐間從季父飛卿攝建昌守因家南城世祖召見授應奉翰林文字官至翰林學士承旨加光祿大夫卒贈大司徒柱國追封楚國公謚文憲有雪樓集

次韻育堂學士冬日紅梨花

黃菊臥階雨六花舞天風壁凍室生白手僵肉作紅秀句忽墮前光怪侵簾櫳至人宴坐處元氣含冲融無情及枯

侏嫣然爲修容坐令玉華君來從薤珠宮麗粧凝祥雲明
眸轉驚鴻豈非散花手試君情所鍾老我嗜好淡空詩亦
雷同祇願酌花時毋忘比鄰翁

寅夫示再登鼓山詩僕雖不獲同游然求詩不可虛
辱次韻奉謝且致歸班之僣

勝處心知只耳聞那因君句得奇芬海天昏黑龍行雨樓
閣青紅蜃吐雲仙境烟霞從痼疾詩家風月要平分悠然
佳興誰能敗俗吏當前自糾紛

眼前培塿足縈纏去去瀛州大洞天一息南溟能幾月再
行東海定何年江淮巨浪千堆雪榆柳中原萬里烟解視
歸裝還不俗有詩曾酌瘴鄉泉

寄周子靜唐靜卿二翰長

故人天上近何如白玉堂中足寶書
燭徹宮蓮三鼓後露溥仙掌九秋初
江湖政共丹心老魚雁全如綠鬢疎
西北關千天咫尺欲乘黃鶴却躊躇

七眞山洞雲觀

七眞之山白雲裏絳闕神宮半空起
祁君有志于君成更賜雄材自天子
東臨滄海西崑崙森森翠節排天門
三更日射芙蓉色六月石挂冰霜痕
山頭彷彿清虛府洞底陰岑太行路
青苔能識六龍車明月常懸萬年樹
峯盤澗複氣網緼瑤草金芝日日新
君王自有長生藥端拱無爲萬國春

早行圖

萬山迴合路紆縈獨策羸驂欵欵行却憶麻源三谷裏盡
橋攜酒聽溪聲

送人赴浙東木綿提舉

曾歷金華三洞天風流歷歷記山川柏林白綻梅花小柿
實紅垂橘彈圓訪古但聞羊化石因君又喜木生綿霜風
渾似當時峭愁絕雙溪八韻篇

和王寅夫郎中元日立春

馬蹄塵裏度芳辰帶得陽和到七閩山翠倚天迎好客風
光滿地屬吟身高情古柳仍青眼時態天桃自絳脣從此
不憂江海遠春官袖有十分春

次韻寄謝財江學院諸先輩

學生事業竟何成
冷笑猶然愧宋榮
日逐黃塵雙袂暗
夢回綠幙一燈明
交情欸欸知君厚
佳句翩翩使我驚
皓首相期崇令德
殷勤遠寄白絲行

題採蓮舟杯

攀翻葉上露
釀作杯中酒
可能君不醉
負此摻摻手

板橋午食

縣郭二十里
板橋三五家
西風熟禾黍
陸地富桑麻
去歲遭洪水
高林帶舊槎
他鄉豈不好
無奈此生涯

送余率翁職滿謁選并寄容齋承旨冒堂學士

江南四月梅子黃
衣袖已試荷風香
出門有客欲萬里
使

我憶得西山蒼西山何處雲半髮夜深斗極回寒芒磴泉
自紅澗自碧樓倚白雪歌滄浪容齋遂懽兩相好劒氣耿
耿龍騰驤我曾握手極千古逢之滿腹生琳琅曉天一笑
江水長燕鳴岸雨催牙檣

奉餞學舟老先生之武陵

疾風吹雲雲不裂南紀酣酣三日雪辰陽冷掾故不冷破
帽棕鞋來作別先生自是我輩人錦袍丹紱曾青春黃金
築臺不肯上水晶宮中一角麟一朝忽著儒冠起泛宅浮
家五千里繫船花岸茹蒸霞爲展臯比說詩禮宣尼未始
三年淹我亦鳴榔下湘水蕭雲曹志上所知銓量當遣教
五溪先生行止無不可瓜期况爾來遲遲問君此行何所

之武陵思我還當歸是問少長致足樂采花食實薪桃枝
落日天低洞庭野木葉蕭蕭風上下畱君小住君掉頭前
有十漿先饋者蒼蒼煙水解迷人莫倚川原物色新漢家
曾有蒲輪使珍重修程穩致身

舜舉畫棠梨練雀

霜暈棠梨臉風梳練雀翎含毫心欲醉開卷眼還醒

送尹生歸江西

江漢秋深雁過稀悠悠歸思夢先知輸君去住無多事顧
我畱行待幾時野岸曉光千棹急平湖寒影數峰欹拍肩
試向洪崖說儻有黃花覓一枝

喬達之畫江山秋晚圖

西日遮來正莫秋買魚沽酒醉船頭如今見畫渾疑夢知
是南湖第幾洲

別來事事可名家獨我空添兩髻華天際有山歸未得遠
峰休著淡雲遮

上賜潘司農龍眠拂菻婦女圖

拂林迢迢四萬里拂菻美人瑩秋水五代王商畫作圖龍
眠後出尤精緻手持玉鐘玉爲顏前身應住補陀山長眉
翠髮四羅列白氎覆頂黃金環女伴駢肩擁孤樹背把箇
花調兒女一兒在膝嬌欲飛石榴可憐故不與涼州舞徹
來西風琵琶檀板移商宮娛尊奉長各有意風俗雖異君
臣同百年承平四海一此圖還從秘府出司農潘卿拜賜

歸點染猶須玉堂筆
天門蕩蕩萬國臣
駟騎橫行西海濱
聞道海中西女種
女生長嫁拂菻人

送武當張真人赴召祈雨南歸

聖主憂凶歲
真人下碧岑
雲辭武當黑
雨入薊門深
獨抱回天力
常存濟物心
兩宮宣賜罷
歸鶴杳沈沈

送戴道士住天台

君承恩命住天台
萬壑千峰繞絳臺
門外霞川浮溟滓
杯中雲海接蓬萊
時同野鶴看桃去
或領山猿採藥迴
三十年前吾亦到
舊題應入白雲堆

李伯時馬

龍眠畫馬真是馬
一疋猶當萬金價
參差粉墨見龍媒
渴

飲長江柳陰下我今老病無所求但願早賜歸林邱肩輿
飽飯百不憂閒看稚子騎犁牛

趙大年小景

疋馬衝寒踏落花杏園深處曲江涯何如相對風軒坐喚
得漁船傍酒家

元 淮

淮字國泉別號水鏡臨川人至元初以軍功顯閩
中官至溧陽路總管有金剛吟

南國新柳

萬縷依依帶嫩黃斜穿紅杏弄疎狂晝長舞得東風困半
倚鞦韆半拂牆

春遊憶武陽

繞郭烟嵐溪上來，千峰碧玉一環開。
紅雲島上熙春路，簾幕重重瞰楚臺。

郊行

城東一簇野人家，門枕清流淺帶沙。
籬角欲晴喧燕雀，門前過雨濕桑麻。
橋因春水三番斷，柳礙東風一晌斜。
景物似知寒食近，邨邨開遍野棠花。

寒食

城西爛漫拆桐花，珠翠郊原散綺霞。
試問溧陽新燕子，今年寒食又無家。

北望

江西詩徵

卷三十五

十

公餘信步上譙樓
雲淡天低萬里秋
遙望神州煙靄裏
夕陽紅處是瓜州

文婦詞

掠起雲鬟賦小詩
文窗晝永筍初肥
木香架畔薔薇落
簾幕無風燕子飛

小滿

子規聲裏雨如烟
潤逼紅綃透客氍
映水黃梅多半老
鄰家蠶熟麥秋天

人日書懷

歷日池塘凍水綃
嫩紅嬌白見芳苗
郊原雪霽東風軟
籬落梅殘碧玉彫
便好踏青穿細草
不妨攜酒驟鳴鏹
遙憐

九曲沙堤畔多少鵝黃上柳條

春詞

繡被春寒掩翠屏家常只繫石欄裙
鮫鮪誤落花磚上旋向沈香火畔薰

午寢

鷲來踏碎亂紅翻盡日簾垂晝永
閒午睡覺來香味遠金猊猶有鷓鴣斑

春閨

杏花零落燕泥香閒立東風看夕陽
倒把鳳翹搔鬢影一雙蝴蝶過東牆

南園杏花

燕脂萬點怯輕寒
蓓蕾枝頭絳雪乾
昨夜南園春雨過
玉人曉起揭簾看

望淮樓

向晚登樓望遠山
浮雲密處是長安
無詩可說淮南事
獨倚西風十二闌

天水鑑對月

昨夜新霜釀曉晴
晚霞人海耀南關
可憐天際鄉關月
也到金甌照旅人

南樓

向晚西風入翠微
樓西一隙透斜暉
寒蟬底事聲凄切
催得飛鴉打陣歸

水竹軒乃予退居之所政與
春樵嵐相鄰朝莫之
間雲煙變態四時之景氣象
萬千其畫工吟筆之所
不能盡者皆致吾書窗几席之間因賦樵嵐閑居水
竹軒土字韻邀好事者和之

水鏡得閑居修竹蔭軒廡樵嵐城
外迴有山林趣幽窗
宜習靜孤坐忘百慮風枝正韻秋寒葉更飛雨茲來息奔
走卽此成燕處道勝物自輕權勢自糞土

王義山

義山字元高豐城人宋景定進士知新喻縣歷永
州戶曹入元應聘掌江西學事學者稱稼村先生
有稼村類稿

令泉亭

石溜寒泉樹色陰我來本不爲花尋願分一滴清冷味盡
滌平生塵垢心虛洞紆風橋影曲急灘瀉月水痕深襟期
難與凡人道好和滄浪濯足吟

小泊安仁縣市

安仁城斗大地窄瞰官途吏取晚衙早人稀夜市無山多
田占少澗曲水來迂已是荒寒甚鄰家猶索租

贈申居御史

雲渺梁碭山水深千年標格杳難尋祇今來伴東湖月惟
有沙鷗識此心

挽遂初陳尚書

到得咸淳國步艱幾回抗疏動天顏丈夫那肯死牖下餘
子從教活草間有分朱崖終著去無心白髮望生還故人
日斷暮雲處霧雨濛濛山外山

書永嘉嘉禾驛

老來倦躋攀悠悠憩山側層嵐軼窈窕紆縈困行客崖傾
覺嶮巖徑曲盤逼迫石老枕雲根橋橫界野色海嶠吞暝
暉松標挂辰極殘煙罩成幄長波曳如帛天際烏知還溪
間魚自適幾忘物與我慮澹意常寂泛觀穹壤間天亦局
於迹榮華忽彫枯俛仰遽今昔傾義條再旦急軌等寄驛
愚公果何爲老且欲移石

古意

東籬采秋菊秋菊清且香采之欲寄誰聊以寓感傷感傷
何所思故人天一方故人日以遠思君豈能忘瞻望兮弗
及西山傾夕陽黃昏人倚樓一聲笛何長

挽竹薌龔侍郎

一木難支大廈傾闔門判却赴波鯨歸來止爲尋墳隴隱
去那教知姓名賸有詩書傳不朽相從野老話平生翩翩
雙鶴扶雲去羣玉峰頭籍太清

挽平軒王府判

猶記瓊林錫宴時平軒折得好花歸而今花與人何在日
暮江東雲自飛

熊朋來

朋來字與可豐城人宋咸淳進士元初徵爲福建
廬陵教授以福建州判官致仕其學深於三禮爲
當時所宗學者稱天慵先生有天慵文集

鐵柱詩

九牧失貢金司空不行水蛟龍弄波濤魑魅入城市吁嗟
晉清談萬事漫不理遂令千載人稽首旌陽子

姚雲

雲字聖瑞高安人宋咸淳進士官工刑部架閣入
元授承直郎撫建兩路儒學提舉有江村遺稿

碧山

彭祖嶺頭春草生逍遙洞口暮烟橫分明半幅著色畫何

許黃鵬流一聲

青蓮山下玉泉寒蒼耳香中養白鵬浪說仙來天地外桃花流水只人間

趙文

文字儀可一字惟恭號青山廬陵人初名宋永三貢於鄉由國學上舍仕南雄府教授嘗從文丞相勤王入元起東湖書院山長尋改教授有青山榮瓊花上天歌

朔風吹沙堆浪白二十四橋沈冷月顛風夜半撼蕪城雪萼瓊絲破空碧金餅歲歲獻君王玉罌泛酒蓮花香明光殿暗沙漠遠人自無情花斷腸落蕊飛天識天路何如援

樹飛昇去唐昌游女再歸來城中只賣瓊花露江南俘客
吟如叫想像裁辭不成調天宮夜半按霓裳玉女擎花紫
皇笑

公無渡河

河之水深復深舟以濟猶難謀被髮之叟狂不可箴豈無
一壺水力難任與公同匡牀恨不挽公襟亂流而渡直下
千尋我泣眼爲枯我哭聲爲瘖投身以從公豈不畏胥沈
同歸尚可忍獨生亦難禁公死狂妾死心蛟龍食骨有時
盡惟有妾心無古今河之水深復深

團扇歌

私衣必見污葛屨必遭踐生世不爲男託身况微賤悲痛

只在心憔悴更障面出入懷袖中羨郎白團扇

丁督護

丁督護爲我行去時馬上郎今作野外殤男兒
冑斷頭歸見空斷腸丁督護聽吾語欲從君臂不羽
嫁時所結髮剪之隨君去丁督護念我苦未亡人殤
鬼婦古若無術冤乾坤無風雨

銅雀臺

朝望西陵墓夕望西陵墓望望不復歸月朝又十五
月朝十五可奈何更對空帷作歌舞銅雀昂然飛不
去當時美人髮垂素我生不如陵上樹年年樹根穿
入土

法壽樂歌

西雲垂天飛流黃寶鬘百萬隨風揚帝居塵醺首羅鄉采
女如花侍帝傍珠啼玉唾天花香澹然神情無世妝下視
邢尹紛醒狂梵唄琅琅出清吭天庖供饌薦豆觴帝飲食
之壽以康恒沙世界俱來王天王神聖臣忠良春風萬里
酣耕桑雨滴可數海可量無有能知法壽長但願梵天釋
帝萬億歲歲壽杯天下醉

次韻劉耘廬

江南有故事極熱介秋夏空齋得幽景衆綠天所畫對景
愜余情談文及茲暇山風吹池月不似城中夜百年易過
花萬事庶生蔗義和如走馬疾急不可靶何妨奴屐光詎
肯吏侯霸一笑且披襟新京自無價

雨行五嶺下

天地忽晝晦四山潑墨濃而我行其間宛然如游龍大風
吹倒人欲避無所容有翼不得張狂走急雨中數里乃一
息如出鯨人宮老樹道邊拜疑我行雨工過午上五嶺攀
緣入青空仰視萬山巔有氣如炊籠下視田間白云此鋤
田農茲行豈不苦奇觀亦已雄惜哉如此山不與曉景逢
不曉韓吏部登華哭途窮

去者日以疎

去者日以疎留者日以老沉憂能傷人元髮坐成皓人生
固應爾要亦何太早携持玉雪姿故敢棄遠道蒼天行悠
悠自日照杲杲安得以妾腸化作君墓草

行雪

夜寒枕席跳霰玳夜深我睡霰亦無未晨僕起索炊火怪
見滿地瓊瑤鋪我行至此不得止但倚紅酒爲先驅路逢
十店九閉戶苦寒正是無薪芻終然著地卽化去造物何
用勞工夫前山欲融未融處玉龍浮動青珊瑚藤箱竹刺
時點綴寒食野花栖路隅小車行雪真有益平生看畫無
此筆

題畫蟲鳥

泥行郭索其神全枯枝獨抱吟風仙細腰追逐相後先畫
眉雙棲鬬嬋娟一鳴一止俱自然老猴如鬼踞石邊游蜂
何爲過其前水禽伺魚雙眼穿久而無得倦欲眠鷓之鴒

之高樹巔俯視螳臂爲垂涎之蟲不作名利牽飲啄之外
何所便人生擾擾真可憐笑談對面森戈鋌王侯螻蟻俱
埃烟大年未可笑小年世間唯有蟲能天

食魚江水邊

食魚江水邊投骨江水中衆魚逐其腴踴躍以相從所得
僅濡沫滿意如遊龍焉知此棄骨與爾類本同人間網羅
多江海不得容小魚得骨莫浪喜且可慎汝出入蹤

西江柳氏月江詞

何人種此玻瓈橘掛在高空寒露濕秋風吹墮清冷中蟄
殺神蟄夜深蟄鉅鉤潭中豈無月冷光長照衰羈泣何如
阿孫屋頭月時時我取杯中吸吸餘吐向筆墨間紙上淋

滴流月汁前。初火到詩屋。月走江寒燒。不及青山夜起。
繞。皆山滿地蘆花。不堪拾。何時短棹釣江西。雪寒一夜無。
簑笠。

尋郭道士不遇

問師云已出杖履水東灣。世上方多事。山中亦小閒。竹光
新雨後。禽語夕陽間。自出雲關去。鐘聲送我還。

二月十四夜夢中吟云。隔溪啼鳥東風軟。滿地落花
春雨深。次日陪謝少府飲章聖寺足成之。

畱得餘寒伴客吟。驀然萬感赴沉吟。隔溪啼鳥東風軟。滿
地落花春雨深。草一樽聊若下。匆匆千載亦山陰。月溪
橋上凭欄久。應有游鯈識此心。

寄歐陽振仲

晚客他州只爲飢無人可與話心期前生一念有今日投
老相逢復幾時頭白可知天下事秋深定有客中詩何當
細雨梅花下眼底故人今是誰

咏梅

我與梅花別後期停雲倚樹髻成絲偶於溪路相逢處正
似故人初見時清裏有和夷惠聖寒邊帶瘦島郊詩客中
無酒能消得共煖寒灰坐欲癡

題郭索集

鉤輅格磔李羣玉鬼眼瀕耳樊宗師人生歌哭貴適意閒
倚秋江聽竹枝

禾川歸途

天亦寒癡日易曛客情黯黯似春雲不知細雨止還作自
倚籃輿看水紋

壽王餘慶

卽時杯酒不須名我愛先生醉是真雪柏霜篁千歲質川
花池草幾番春少陵句妙驚山鬼老子心閒養谷神如此
眼前聊一笑此生猶是太平人

吳澄

澄字幼清號草廬崇仁人宋末舉進士不第入元
程鉅夫薦至京師以母老辭歸再召起國子司業
遷翰林學士泰定初爲講官加授資善大夫卒贈

江西行省左丞臨川郡公諡文正有草廬集

壽王講師

欲雪未雪雲黯黑不知此口神仙謫桃實今經幾度紅梅
花仍似當年白脈向閩山食荔蕉喜來江浦訪鸞簫廣文
客舍寒如許自有春風長藥苗

湖口阻風登江磯山觀濤

狂風吹人渾欲倒瑟瑟寒聲動秋草捫蘿徑上磯頭山萬
頃江湖波浩渺怒鱗雲鬣奔騰來眩目快心千樣好向曾
觀海難爲觀回首匡廬青未了元雲作帽深蒙頭五老昂
藏元不老何時月夜水鏡淨潏蕩澄虛納蒼昊著我峰尖
伴老人坐看海東紅日杲

題諸葛武侯畫像

含嘯沔陽春孫曹不敢臣若無三顧主何地著斯人

題皮如心行囊中畫竹圖

疇昔江鄉識此君清風凜凜動霜筠被誰點染移將去也
受京華半面塵

建康西江避暑用滕玉霄韻

石頭城下看淮山羨殺白雲終日閑寄語醉中彭澤令如
何飛倦始知還

次韻息窩遠寄

飲罷金盤玉露盃陽和消息到寒梅月華夜照崑崙頂雪
浪春融豔潁堆此事一行嗟便廢迷塗未遠幸歸來高齋

久少高人跡砌面重重封綠苔

題閣阜山

漢吳仙跡兩峰齊欲拾瑤華路恐迷寶殿青紅疑地湧林
巒蒼翠接天低九重香案分雲篆八景琅函記玉題仙鶴
翔空清似水步虛聲在朶雲西

題伯時馬

驍壯雲連力氣麤慣看馳突暗中都如何得此真龍種消
得千金買畫圖

題雪洲圖

向來洲上雪漫漫偃倒詩人一屋寒洲上雪消人亦去
圖猶作雪中看

題和靖觀梅圖

一枝春信到孤山
冰雪肌膚不覺寒
月下水邊看未足
折來更向手中看

歌風臺

黃屋巍巍萬乘尊
千秋游子故鄉魂
韓彭自取夷三族
平勃那堪託後昆
湛露迄今王迹熄
大風終古霸圖存
當時儘自規模遠
誰起河汾與細論

燕城

燕絡中原東北去
吳通上國古今奇
五千里外只如此
數百年來幸見之
弔望諸墳吾有淚
擊漸離筑世無知
西山縣亘三關險
日日羶車鐵馬馳

雪巖詩

木長柔枝草長藤鳳凰岡下老雲仍清名寂寂無名叟白
髮蕭蕭有髮僧晴霰撒珠泉噴薄莫煙凝翠石峻嶒寒山
生怕人饒舌喚作雪巖渠不磨

談經次韻夏編修

六經在天下浩瀚若河漢東流竟日夜萬世資灌溉遼哉
去聖久原遠末益散競持郢書說孰別魯鼎贗雞鵠物之
微猶自了晨旦云胡有目人莫觀星宿爛新安巨子出毫
縷密分辨嗟予童而習弱質少勇悍續緱鉤其深事倍功
未半吾鄉有奇彥京國逞縱觀顧予蠶夢中快甚湯液汗
妙句發新聲巖巖氣魁岸相期五色瓜剖實得庠辦

送涂君歸澗

昨夜抱琴來今茲抱琴去委質隨長風斷蓬與飛絮一家
蠡湖南一住西湖東兩地各縹緲寸心漫怔忡浮雲豈無
依倦鳥亦有棲迎門穉婦笑索果嬌兒唬歸裝春袖薄荒
徑春華落理曲到求凰何人悲別鶴

八駿圖

陰山鐵騎千千匹雨鬣霜蹄神鬼出風馳雲合暗中州蹂
盡東賓西餞日豈皆騶襲與蜚黃拓土開基功第一忽於
紙上見八駿穆滿所乘最超逸如今已死骨亦朽漫向毫
端趁毛質當時造御天上藝僅到瑤池王母室莫雪霏霏
黃竹歌日行三萬竟如何逢時莫問才高下只與論功訖

最多

采石渡

流波萬斛忠臣淚遺跡千年采石磯
南北于今失天限江山如昨愴人非
新潮寂寞陰風怒舊冢荒涼落月輝
一去不來虞雍國當時渡馬更秋肥

泗河

泗堤四望盡平原叢葦荒茅十室煙
淮北更無生草地江南已是落花天
陰風黯黯浮孤艇春雨濛濛冥一川
只有漁翁猶世業長蓑短笠淺灘前

劉壖

漁字起潛號水村南豐人宋末爲本州儒學教授

與同里譙祐以詩文鳴入元薦昭郡學正年七十
受朝命爲延平教授延祐六年卒有水雲村藁隱
居通議等書

送黃修永之武夷杜清碧學

眼中塵事政昏昏華蓋風高翠入雲一代風流超晉宋百
年禮樂寄河汾波寬好看魚龍化天遠空憐雁鴦羣亦有
平生觀海意出門萬里獨慙君

補史十忠詩

并序

詩以厚倫美化爲本非曰諧俗寄情而已卽千篇
奚益每思張許二顏同時死國名芳唐史與天長
存近代死節數公何媿往昔顧麥秀黍離無繇倣

柳州狀逸事上太史庶幾不朽竊以慨念更後幾年遺老漸盡舊聞銷歇將無復知有斯人者悲夫哀哉死臣子職分古人常事爾死矣寧顧其傳不傳乃亦不可無傳者爲其繫彝倫關風教厲後代之臣子媿前日之不如數公者也采清議得忠義臣十人史不書各賦十韻纂其實曰補史詩

知潭州湖南安撫使李公

芾

三已甘退休十連起遲暮伊誰急求子流落乃不怒黑雲來如山殺氣震平楚恭惟君父命封疆以身護闔門義不辱呼卒汝善處飛魂隨劍光自巳投火去天泣鬼神愁地搖山岳仆吾非莒柱厲敢以死醜主正自常事耳命義逃

安所冲遠誰與儔睢陽有張許

吉愷字祖冲了穆字彥遠皆晉忠臣

池州通判權州事趙公

卯發昌州人妻雍氏

若人作何狀立節乃殊偉人言此蜀珍位卑名未起坐分
秋浦月攝此千里寄沙頭風色惡寒城凜宏峙吾聞開關
迎棄遁亦復恥茲惟城郭臣大義吾知已問道走帛書灑
血別玉季細君絕可人雙飛同一死南人彼男兒此婦乃
如此骨朽香不廢吾詩當青史

丞相都督信國公文公

天祥丙辰狀元

時平輒棄置事迫甘前驅嗚呼忠義臣匪直科目儒江寒
朔吹急列城同一趨豈不寄便安綱常乃當扶移檄倡諸
鎮舊袂躬援枹川決莫我回萬險棲海隅天平復不濟道

窮竟成倖一死事乃了吾頭任模糊悠悠譏好名責人無

已夫三衢有魁相投老作尚書

三衢魁相
謂留夢炎

參政行丞相事陸公

秀夫

天地無託足海天同隰光明知復何爲不忍墮三綱裸薦
覲少延謳歌寧遠忘或者莒在齊聊且帝一方竭蹶竟委
頓臣謀非不臧運去天莫留力盡心彌強終不負吾主名
義天地長懷璽隨龍遊舉室水中央斯人文華士乃爾百
鍊鋼機雲儻通譜應羞朝洛陽

前左丞相江文忠公萬里弟萬頃

匡廬雲錦屏鴻儒產其下風神儼如龍天矯莫可駕卷懷
經濟具婆娑洛中社怪事玉牀搖清晝天忽夜突騎從何

來陰風飄屋瓦大臣義有死欲避吾不暇庭前環止水
事付一捨從容友靈均朝野動悲咤愍章極哀榮汗簡誰
記者倘有南董書季方足堪亞

江西制置司都統密公

侑

臣有致身義豈計官崇卑偏將知死忠不曰天下奇漢節
旣披靡失位趨江西閫帳駐臨汝招來樂其歸雪寒南浦
愁羽檄蘄濟師一將奮風虎鼓行亟颺馳踰嶺疾戰苦裹
瘡呼健兒坐縛膝不屈伏鎖甘如飴小臣裨校耳職也宜
死綏廬州大將在白首豎降旗

淮東制置使知揚州李公

庭芝

淮海接風塵胡乃似鐵壁臥護有天人十載藉福力重來

人未老愁絕事如昔苦戰孤城危痛哭天柱折夢遊三山
上人倫浮海出突圍志南征吾欲重建極天弗鑒臣忠冥
冥墮叢棘先軫面如生裴宏血化碧臣死誰復知臣忠終
不易一將更大事嚼舌死罵敵

樞密閩廣宣撫使陳公

文龍戊辰狀元

淳熙名宰孫比德粹如玉決科魁偉英駿駿爲冠肅頻田
煩諫疏相嗔俄嗾逐補郡仍免歸黃流已漫陸天族日光
薄力疾支顛覆蹉跎南冠繫道病死不辱往昔五峰堂傾
蓋語跋燭斯人真妙人哀哉慳厚祿長揖丙辰魁各天並
黃鶴不有二忠存千古笑科目

少傅樞密使張公

世傑

士有守節死豈以責武夫武夫尚能奇消得銀管書何許
熊虎英鐵面美頤須護寒久枕戈赴難甘捐軀金山定活
著志願嗟違初江心集羣策炎精回一噓間關障海濱萬
死存趙孤時也可奈何北風散檣烏漂漂竟何之無乃膏
鯨魚涓濱多貴將返笑斯人迂

四川制置使知重慶府張公

班

邶維拓提封形勝古天府血戰五十秋零落餘八柱江南
傳箭急誰暇此回顧落日古渝城杖鉞乃甚武天東饒雖
墜吾自強支拄渡瀘躬討逆歸來戰彌苦蕭條下夔門機
穽伏中路咄咄快敵仇誰與掩抔土哀哉關西雄國亡猶
不負同時督軍將腰金插雙虎

燕

萬里來從海外邨
定巢時聽語頻頻
簾風半卷重門曉
社雨初晴二月春
尾上繫詩成往事
掌中學舞是前身
華堂茅屋依然坐
幾處相逢舊主人

拜南豐先生墓

崖挾飛泉響珮環
雲涵空翠鎖幽關
斜陽影戀殘碑外
遺像塵昏古寺間
漢苑夢回流水在
越陵風急此山閒
悲懷豈但元豐老
望斷天南月一彎

率諸友祭南豐先生墓

星斗文章煥九天
蕭蕭松檟暗荒阡
久無世胄崇祠像
賴有山僧守墓田
俎豆春回修廢典
佩衿雲合禮前賢
此行

莫作嬉遊看回首元豐重愴然

詠賈似道

三百年餘氣數更東南萬里看昇平黃金臺上麒麟閣混
一元勲是賈生

劉麟瑞

麟瑞號如村南豐人壩子好讀書不求聞達嘗追
悼宋末仗義死節之士得五十律爲昭忠逸詠父
歿又歷述其生平交遊爲小傳題曰執友記

昭忠逸詠

忠義總管田公燧鳳守李公寔

天西戰士競銜枚乘會關夷路始開兩蜀金湯隨水逝三

秦烽火照天來鳳州文武渾無媿馬嶺英靈只自哀後夜
魂歸何處寓隴頭瀟灑一枝梅

西和知州陳公寅守將楊公銳

陰風蕭颯起黃埃鐵騎追奔動地來石壁梯空天險壯水
門疊隙殺機開不期溟海鵬千里自守封疆鴈一杯四十
萬民登鬼錄伊誰爲使哭聲哀

沔州知州楊公起通判王公友仲

談笑誰將敵將殘沔陽屯戍怯孤單兵威到處降非易地
利乘機守亦難五馬交綏疑血碧貳車含憤剖心丹文臣
武將均無忝不負吾君不素餐

階州守臣董公鵬飛

相傳報怨撼階州虎旅飛來睨敵樓
枯矢蔽空天入冥鵝車衝壘地生愁
金城魚肉千年恨闔境衣冠六日休
莫怪傳家猶強項雲孫忠節更風流

天水知軍時公

當可

西河總管陳公

瑞

天水西河兩將強七書貯腹負剛腸
魚麗陣布刀如雪馬革尸空骨似霜
廉藺昔存秦莫敵關張今敗蜀終亡
輕財得士人猶惜長想英風慨智囊

都統曹公

友聞

及大安夜戰死節諸將二首

雁墻名香本一儒執爨幾度爲前驅
元戎却敵世間有敎授提兵天下無
花石峽鑿忠勇奮水牛嶺度死生殊英風
壯節誰能匹千載人稱大丈夫

勇戴兜鍪學六韜赤心報國是英豪徧身膽在存全蜀蓋
世名高憎短曹雞堡出奇師旅沒龍門盡銳弟兄勞當時
制帥猶多計獨向深山遠遁逃

制參王公

翊

十萬天兵壓錦城蘇華一瞬鎖連營小臣獨守紅蓮幕大
義難忘白玉京虎倒龍顛塵漲潯天陰雨溼燐縱橫皚皚
白骨成京觀愁絕靈龜召禍萌

權知文州劉公

銳

通判趙公

汝薊

江流移浚向南山渴死全城膽亦寒叛將踰城機盡泄嬌
兒飲藥淚空潯封疆事去君臣在忠孝名存父子難五萬
軍民同日盡可憐巷戰尚開關

守襄都統制牛公富范公天順

將軍志喜豎降幡偏將能知大義存頭觸危樓輕烈燄腹
經孤館凜忠魂聲沈刁斗摧城影塵掩干將滲血痕世遠
事殊遺老盡更無人解說襄樊

沙洋裨將邊公居誼等

兵威破竹列城驚誰信偏裨不肯迎兩箭離弦聲霹靂二
雄交斃氣崢嶸可憐侯服微臣在忍見人間大厦傾萬木
凋零風雪裏尚餘鐵樹一花明

池州通判趙公卯發昌州人

分守池陽歷幾時坐看戰馬四郊馳半空矢石應難禦一
盡樓臺未易支血染帛書身永訣壁題詩句世長辭細君

江表書後 卷二十五
含笑從君後忠節雙雙今古奇

饒州守臣唐公震

遊騎如飛漸列營誰呼妓女出郊迎奔踰後圃逃生拙執
辱中庭就死明瓦甕掩形慵屈膝金章繫肘齊輸誠太常
定謚應無忝贏得中流砥柱名

丞相江公萬里知府江公萬頃

名重天開侍太微昔年南國秉樞機人歸綠野身猶健兵
滿紅塵世已非止水亭前風淅淅鄱陽城外草依依棣華
相映人間瑞節惠隆名世所稀

宗室趙公崇源

南風不競慘悲聲膜燕泥牛總是驚玉牒名香時已逝金

枝花悴本難榮身明六籍忠仍孝軍滿孤城死亦生後度
推敲明月夜江邨邨外寄幽情

端明招討使汪公立信

如此奇才正可憐曾陳大計爲安邊天存廟社施籌策地
限藩籬老歲年獨眼明明尋趙地丹心耿耿向淮壩江南
寸土聯區脫慟哭高沙赴九泉

丞相信國公文公天祥

金字牌飛出建章鬱孤萬壘爲勤王驅馳嶺海君臣寓囚
繫燕雲道路長六籍一時光日月孤忠萬里立綱常元歸
稟稟渾生氣南北人誇姓字香

從文丞相諸公

杜沂輩信尹玉趙時賞張汴劉洙
繆朝宗孫宗孫卓陳龍復蕭燾夫

彭震龍
蕭明哲

奉檄勤王出潁城願從魁相立勲名誰噓炎運延千載莫
笑寒儒隊五兵常郡戰餘森廟祀空坑敗後麗官刑英才
僂指那能盡凜凜英魂死亦生

常州守將王公安節知府姚公嵩

守合名垂二十秋將軍今度更風流人誇同谷英風壯天
使毗陵殺氣浮守義只知伸我膝成仁那肯護吾頭將門
出將真男子一任模糊血鬪樓

閉門高臥本無蹤起首鄉城更總戎名姓已符前代史邦
家能衛古人風金山不長僧成讖鐵壁雖堅卒易攻城守
兩回希世事橘香不泯氣如虹

湖南安撫知潭州李公

詩

平楚樓頭矢石驚焚香稽首別宸京盡殲妻子期全節寧
死封疆不忍生煙燄張空隳趙壁旌旗倒影下湘城善刀
人在同觀化名與澄江一樣清

知衡州尹公

穀

燕寢凝香未赴衡却從湘帥守湘城衣冠望闕臣辭主詔
誥陳庭弟徇兄劫火鍊成忠孝種英風鼓動懦頑名滿城
盡節榮今古三百年餘德澤清

江東運判趙公

淮妾某氏

石頭城昔號金湯岌岌孤墉戰馬場西日突圍逃溧水南
冠荷校說維揚血凝漢節誇男子身寄秦淮藉女郎千載

妾身貞更潔仰天哭向水雲鄉

都統制密公

佑

漢鄂塵飛路已迷殘兵早發向江西豈知主帥輸城邑謾
使偏裨効鼓鑿就縛呼天懷象魏臨刑吐氣幻虹霓酸風
慘澹精魂遠龍馬坪頭戰鬼啼

沙市監鎮司馬公

夢求

荆水滔滔百尺渾邇來淺縮漫潺湲木城睇岸風輪吼沙
磧屯雲火炬燔效死小臣懷綠綬偷生大闔媿朱幡下官
名姓君知否涑水先生七世孫

淮東制置使李公

庭芝

淮海曾聞一偉人十年臥護息邊塵重來鐵騎攻城急旋

執金戈壯陣頻夢入甌閩期立極路遵通泰條捐身平山
堂下悲風起魂繞瓊花萬樹春

都統制姜公

才

君是礪谿幾葉孫六韜貯腹護邊屯三軍鏖戰嗟無地孤
纍環攻恨出門嚼舌血飛憐勇士衝冠氣憤憶忠魂男兒
南人今重見同翫睢陽月一痕

浙西提刑徐公

道隆

湖守趙公

良淳

太湖殺氣貫天章貔虎如雲壓古杭羽檄星馳徵魏闕牙
檣風逆急勤王軍摧鋒鏑鬼猶厲將躍波濤骨亦香更有
湖州賢太守細君同壽碧蘭堂

參政高公

應松

腸斷吳山錦繡叢六更聲絕海潮空千門鎖月移行在八
駿乘風憇會同扈蹕孤臣慙主辱征鞍萬里哭途窮兩宮
緩緩趨朝陛回首天南獨死忠

蜀帥張公

珪

玉壘浮雲五十秋關西號將勇無儔三吳旣墮猶堅守八
柱脣亡不耐愁瀟水捷收勞騶襲夔門機伏失兜鍪吾君
不負吾寧死遺恨誰憐快敵讎

大社吳公

楚才

誰道吁江一布衣龍韜虎略豈知蹊鉏耰列陣螳初奮
鼓臨風馬已嘶漢將追奔飛白刃楚囚羈紲化紅泥寵褒
已矣忠難泯不向泉閭歎噬臍

儒士王公士敏

此行無復望生還
取哀吟宇宙間
報國豈能恢漢土
遺民空自戀吳山
清風勁節英靈在
斜日沈輝歷數慳
寂寂圜扉終不悔
忠魂莫恨左輪殷

樞密丞相陳公文龍

曾聽臚傳冠集英
當時御筆爲更名
淳熙相譜家種復
德祐樞臣國脈傾
鄉部孤臣迷殺氣
囊山一鼓張軍聲
首邱只戀行都土
愁絕豈關訴不平

嗣秀王

與擇

瑞安守臣

方洪

派接天潢本近親
更生忠節古無倫
千軍守禦來閩路
半歲勤王護宋民
巷戰血流生不辱
劒飛魂逝死能神
風流

喜遇莆城友携手泉扁萬古春

建寧儒士朱公浚

身披薜荔去瓊琚
號遞南來八使車
人隱考亭春自遠
馬嘶春水難誰紆
好扶名義垂千載
不把衣冠辱四書
爲守彝倫先訓在
潔身珍重返吾初

處士林公同

九廟三宮已盡傾
尚從海島寄神京
血書矮壁存吾節
氣貫長虹任汝烹
身隕九京忠義著
名香七聚鬼神驚
海風蕭颯含悲憤
疑是當時肆罵聲

丞相陸公秀夫

八面兵威八面攻
馮夷飛血洗千篷
波翻水寨乾坤震
風

仆櫓旗社稷空百辟散班奔鶴首孤臣扈蹕愁龍宮茫茫
南國重回首一片丹心照海紅

樞密張公

世傑

曾擁貔貅奏凱歌匡山雲暝竟蹉跎
地空九有棲荒服寨列千艘保海阿
龍躍璽沈天若此烏鳴石絕事如何
鯨波沃日炎光熄凜凜英魂尚枕戈

江東制置使謝公

枋得

草履麻衣漫蔽形十年賣卜慣零丁
願從楚地師龔勝欲向遼城友管寧
采石吟成期絕粒娥碑讀罷棄餘齡
一門盡節均無媿千載西山疊疊青

廣西經略馬公

璧

赤白囊飛廣海濱關西勁勇是奇人暫提節印期全璧倏
報烽煙又震鄰械坐已空身不化龍韜未展氣如神鑑湖
亦有雲仍在千載流風豈隱淪

美人朱氏

給事中宮已歷年蒙恩扈從赴幽燕名王索好緣難合烈
婦捐生節已全日晏寢門疑鎖鑰夜長驛館泣嬋娟同來
小妮猶堪詫一樣清風兩地傳

孺人林氏

兩家累世結婚姻閨閣崇崇作宋臣忠貫鵠原期報國刑
驅鴛侶誓全身名傳閩嶠花如玉血染吳鉤草作茵魂隱
脂香千樹裏傾城傾國媿斯人

死節諸公

往事猶疑曉夢圓當年扶義付飛煙
姓存名沒時難問國破家亡事不傳
青史寂寥忠義傳赤心勃鬱死生年
文謨武畧渾無展猿鶴沙蟲亦可憐

三百年餘雨露深杭雲汴雨兩銷沉
堪憐許遠張巡節誰識程嬰杵臼心
萬里關河空感慨兩京歌舞莫追尋
遺民已盡遺風遠遺事何人共細吟

少主納款

天目山崩歷數終降幡颯颯出孤墉
六龍卷霧歸三島八座迎風啟獨松
塵掩玉階消王氣潮移雪屋示軍容
由來興廢天難問斷礎頽垣泣曉葢

王復

復字中行廬陵人

錢塘懷古題仙源雲仍家譜

函封仙譜慨前朝派接天潢世胄遙九廟已迷梁苑雪諸
陵空倚浙江潮山中父老今何在海上王孫不可招掩卷
共君悲喪亂天涯風雨客魂銷

嚴春山

春山撫州人

韓王堂雪

帝星夜度紫微宮滕六先驅擁玉驄立處袍生風絮白坐
閒烟煖地爐紅宋家數百年天下普第兩三杯酒中榻外

有人方解睡夢回花月小樓東

葉水村

水村龍泉人

伊川門雪

戶屢天寒侍講帷先生瞑目坐如癡丈函立久已潛悟尺
瑞積深渾不知白室虛生初見頃紅爐點化且休時一家
教法清和異伯子春風更可師

江西詩徵卷二十五